



Inatsisartunut ilaasortaq  
Kristian Jeremiassen  
-/maani

**Inatsisartunut ilaasortamit Kristian Jeremiassen-imit, Siumut § 36 imm. 1 naaper-  
torlugu apequtigineqartup allakkatigut akissuteqarfigineqarnera.**

**Qasigianguani nakorsaqaarnermut ernissuortoqaarnermullu tunngatillugit Naa-  
lakkersuisunut apeqqut.**

Inatsisartunut ilaasortamit apequtigineqartut qutsatigaakka.

Apeqqutit imaapput:

- 1. Qasigianguani nakorsaarutissava?**
- 2. Sooq ernisunik ikiuttarneq Aasianniinnaq ingerlanneqartaleriarpa, erniniartut Qasigianguaniit Aasiannut erniartortinneqartalerlutik?**
- 3. Peqqinnissaqarfimmi aaqqissuusseqqinnermi Qasigianguani ernisoqartuaan-  
nartoqassasoq oqaatigineqartoq sooq eqqortinneqangila?**

#### **1-imut)**

Peqqinnissaqarfimmi annertuunik maanna suliaqartoqarpoq piffinni aaqqissuussaane-  
rit sulisullu aalajangersimasumik amerlassusissaannut maannakkorpiaq unammilligassa-  
nut, innuttaasut qanoq amerlatiginerannut aamma najukkani innuttaasut katitigaanerit  
naleqqussarlugit. Tamanna aamma Qasigianguani peqqinnissaqarfimmut atuuppoq.

Apeqqutaatinnagu suliap tamatuma qanoq inerneqarnissaa innuttaasut tamatigut qulak-  
keerunneqarsimassapput nakorsiarnissamut, najuunermikkut imaluunniit telemedicini-  
mi atortorineqartut aqutigalugit. Tassanngaannaq pisoqartillugu aammalu piffissani  
nakorsaqaarfiunngitsuni peqqinnissaqarfimmit qularnaarneqassaaq, tassanngaannaq  
pisoqarnerani katsorsaaneermi napparsimasunillu paaqqutarinninnermi immikkut pigin-  
naasalinnik peqqissutsikkut ilinniarsimasunik sulisoqarnissaa.

#### **2-mut)**

Assingusumik apeqqummut 22. februar akissutigisami meerartaartoqartarneranut tun-  
ngasut Naalakkersuisunit annertuumik pingaartinneqarput, ilaatigullu 2002-mi ernisus-  
siornermi maleruagassat atortuulersinneqartut pissutigalugit sulinermi ajunngilluinnartu-  
nik atortussaqaarpoq, meerartaartarnerup tungaatigut nunatsinni assigiiaartunik malittari-  
sassaqaarnermik qulakkeerisunik, aamma naalungiarsuit toqusarnerisa ikilisinneqarnis-  
saannik siunertaqartunik.

4. juni 2010  
Sagsnr. 2010-031773  
Dok. Nr. 385967

Postboks 1160  
Tlf: 34 50 00  
Fax: 32 55 05  
3900 Nuuk  
Email: pn@nanoq.gl  
www.nanoq.gl

Ernisussiornermi maleruagassatigut allaaserineqarpoq ernisussior tumukarnerit aamma nakorsiarnerit ikinnerpaamik qassit naartusumit naartunermi nalaani ingerlanneqartassanersut, kiisalu qanoq iliortoqartassanersoq pissusissamisoortumit allaanerusoqartillugu. Maleruagassatigut taakkunatigut qulakkeerneqassaaq naartusup naartunermi nalaani tamakkuninnga immikkut ilisimasalinnit qanimut malittarineqartarnissaa. Naartusunut illoqarfimminni nunaqarfimminiluunniit ernisussior toqanngitsunut Peqqinnissaqarfimmit isumagineqassaaq maleruagassat allaaserineqarsimasut eqquutinneqartarnissaat.

Naalackersuisunut pingaarnepaajuvoq arnat ernisussat taakkualu naartuisa inuunerisa ilorrisimaarnerisalu navianartorsior tinneqannginnissaat. Taakku saniatigut ernisunut peqqinnissaqarfiup kiffartuussinerata pitsaassusaata qaffasinnerpaajunissaa pingaartinneqartarpoq. Tamanna tunngavigalugu pingaaruteqartorujussuuvog ernisussiornermi piareersimasussaataanerup tamakkiisumik isiginiarneqarnissaa.

Ernisussiornermi maleruagassani ersarilluinnartumik allassimavog sumiiffimmut erniffiumsumut piumasaqaatit suut piumasaqaatigineqassanersut:

- Ilinniarsimasumik sumiiffimmi ernisussior toqassaaq.
- Ernisumut meeqqamulluunniit suli erniunngitsumut tassanngaannaq ikiorsiinnissamut periarfissaqassaaq, tassanngaannaq naatsorsuutiginnisanillu pissusissamisoortuunngitsunik pisoqassagaluarpat aamma pisariaqalissappat asser suutigalugu pilaalluni ernisitsinissamut.

Piumasaqaatit taakku eqquutissinnaajumallugit peqqinnissaqarfimmi, ernisussior tup sulisup saniatigut aamma ernisarfiit tamamik inuttaqartinneqassapput peqqissaasumik/peqqissaanikkut assistentimik, ilisimajunnaarsitsisartunik aamma nakorsamik pilattaanermik misilittagalimmik, naatsorsuutiginnisamik tassanngaannartumillu ajornartorsuutini pinngortoqassagaluarpat piareersimasinnaasunik. Peqqissaanikkut sulisunut taaneqartunut tamanut peqatigitiillugu atuuppoq ilinniagaqarsimanikkut pitsaassuseq pineqartumi sungiussisimanermut attuumassuteqarluinnassamat.

Ernisussiornermi malittarisassani allaaserineqartutut ulloq unnuarlu sulisoqartitsinissamik piumasaqaatit Qasigianguit Napparsimmaviata qulakkeersinnaanngimmagu, pisariaqartinneqartumik tassanngaannartumik ikiorsiisinnaaneq qulakkeerneqarsinnaanngilaq, ernisarfinnut piumasaqaatigineqartutut. Tamanna tunngavigalugu Qasigianguani naartusunut kaammattuutineqartarpoq Aasianni erniar toqquullugut, tassanngaannartumik pisoqassagaluarpat ikiorsiisinnaaneq tassani neqeroorutigineqarsinnaammat.

Arnamut, naartumut, peqqinnissaqarfiup kiffartuussinerini pitsaassutsimut peqqinnissaqarfimmilu nukit piusut eqqarsaatigalugit periarfissaqanngilaq qulakkiissallugu arnat tamamik illoqarfimmi najukkaminni ernisinnaanissaat. Peqqinnissaqarfimmit ilisimaar neqarluinnarpoq tamanna naartusumut kinguneqartartoq, tassalu ernisussanngoruni angerlarsimaffini ilaqtanilu qimattariaqartarmagit. Taamaattumik kingunerisinnaasat pitsaanngitsut ikorsiiviginiarlugit sulissutigineqartuarpoq misissorneqartuarluunilu ikorsiisinnaanissamut periarfissaqarner soq.

**3-mut)**

Ernisussiornermi maleruagassat, 2002-mi atortuulersinneqartut ernisussiortoqarnermi nunatsinni assigilaartunik maleruagassaqaarnissaata qulakkeerneqaarnissaanut aamma inoorlaat toqusarnerisa annikillisinneqaarnissaannut tassaapput peqqinnissaqarfiup pisortatigoortumik isummiussai, tamakkulu peqqinnissaqarfimmi allanngortitereqqinniarluni pilersaarutinut atatillugit oqallisigitinneqarsimangillat.

Peqqinnissaqarfimmi allanngortitereqqinnissamik pilersaarutit apeqqutaatinnagit Qasi-gianguani taamaallaat ernisoqarsinnaavoq periarfissaqarsinnaappat/periarfissaqarsimappallu ernisussiornermi maleruagassat pineqartut eqquutinneqarsinnaanerat.

Inussiarnersumik inuulluaqqusillunga

  
Agathe Fontain



20. maj 2010

Inatsisartut suleriaasianni § 36 imm. 1 naapertorlugu Naalackersuisunut apeqqutit imaattut matu-muuna saqqummiuppara:

**Naalackersuisunut apeqqut:**

**1. Qasigiannuani nakorsaarutissava?**

**2. Sooq ernisunik ikiuuttarneq Aasianniinaq ingerlanneqartalerniarpa, erniniartut Qasigiannuaniit Aasiannut erniartortinneqartalerlutik?**

**3. Peqqinnissaqarfimmi aqqissusseqqinnermi Qasigiannuani ernisoqartuaannartoqassasoq oqaatigineqartoq sooq eqqortinneqanngila?**  
(Kristian Jeremiassen, Siumut)

**Tunngavilersuut:**

Uggornarpoq Qasigiannuanilu innuttaasunut tamanut pitsaasuunani erniniartut illoqarfigisaminniit aallartalerriarnerat, tamanna assut ilaqutariinnut sunniuteqassooq pingaartumik qitornartaarniartunut, peqqinnissaqarfimmi aqqissusseqqinneq eqqartorneqalermat paasinarpoq peqqissutsimut pisortaqarfimmiit oqaatigineqarmat pisarnertut naartusut maani illoqarfimmi Qasigiannuani ernisarnerat ingerlaannassasoq oqaatigineqarmat, kisiannili aqqissusseqqinnerup piviusunngulernerani ajornerusumik kinguneqarniartoq erserpoq.

Pinngitsaalisalluni aallarluni erniartorluni misigissutsit assigiinngitsut ilaqutariinnut takkussuut-tarput, meerartaarnermi tassaavoq inuunermi misigisanut nuannernerpaanut ilaasoq, pingaartumik aamma ilaqutariit akornanni nuannersumik sunniuttartoq. Qasigiannuaniit ilaquttat qimallugit erniartortoqartalerneratigut maqaasineq kiserliornerlu annertoq atorneqalersussaapput, tamannalu ilaqutariinnut peqqinnanngilaq.

Paaserusuppara Qasigiannuani nakorsaarunniarnersoq, isumaqarpunga nakorsaaruppat illoqarfimmiunut ernumanartuusooq, tassami pingaaruteqartuaannarsimavoq illoqarfimmi allanisuulli maani illoqarfimmi nakorsaqartuaannarnissaa. Erniniartut Aasiannut erniartortittalernissaannut peqqutaanerpa Qasigiannugit Nakorsaarunnissaat?

Peqqissutsimut Naalackersuisumut qinnutigivara nassuiassagaa sooq siunertaq allanngortinneqarsimanersooq, tassa erniniartut sooq Qasigiannuaniit Aasiannut aallartittalerniarneraat?

Inussiarnersumik inuulluarit

Kristian Jeremiassen  
Inatsisartunut ilaasortaq, Siumut